

摘藻堂四庫全書薈要

集部

欽定四庫全書薈要卷一萬五千七百八十五

集部

盤洲文集卷三十五

宋 洪适 撰

表二十一首

謝賜先臣諡忠宣表

伏蒙聖恩以臣弟左朝散郎守起居舍人臣遵有請特  
賜先父徽猷閣直學士左朝散大夫臣某諡忠宣者先  
臣銜使不忘徇國之忠同產抗章仰拜易名之寵哀榮  
終始感涕縱橫中謝竊以六家所以成書斷自周公而

下三品然後節惠詳夫唐世以來褒貶咸決於君前善惡不誣於身後非有傑出之迹安得殊常之榮伏念先臣當鳴鏑之敗盟以單車而脩好聞諸夫子不辱命於四方執我行人甘茹毛於窮海艱難備矣操守確然數其渝誓之誓折彼取蜀之問及上介汚北庭之祿之死靡他至同倫易異國之官沒身不屈屢臨白刃弗變南冠至於間道以奏祐陵冒禁而朝太后祕計屢通於係帛危機嘗困於畫牢流邁冷山七八月而見雪操持禿

節十五載而入畱蒙神聖之簡知值權邪之毀鬲遠投  
裔土莫駐顏齡幸逢琴瑟之更張遂致絲綸之洊出賜  
之嘉諡卓爾異恩著甲令以顯褒達丁年之善聞諸孤  
不肖益殫戴舜之誠幽壤有知必效亢回之報茲蓋伏  
遇皇帝陛下躬行仁政心念功臣謂匡衡之排妒陳湯  
皆其私怒而忠州之譴逐陸贄恨不生還隆曲澤以飾  
終示清朝之彰善事光存沒風勸邇使忠貫日月之  
稱在德蘊丘園之上臣謬居家嫡獲奉烝嘗掃地焚黃

丕變松楸之色瞻天上牘不勝狗馬之心臣無任

代程樞賀南郊禮成表

清蹕就陽得卜郊之剛日泰壇拜況踐類帝之明禋凡  
在式圉率同擊壤中謝恭惟皇帝陛下補天興業貳地宅

尊偃武修文不膠馬上之治制禮作樂有考鹿中之祠  
燭骨蕭以揭虔滌繭栗而備物雲門存古先之舞芝房  
奏新作之歌駢駒鸞路之弗違風馬羽旄而來下歡該  
四表釐逆三神雲非霧以祥開月從星而光燭降年有

永等皇祐明堂之詩迎日之長推有熊寶鼎之筴迺漏  
泉而豐澤俾畫地之施刑簡策特書國家編典臣退居  
故里阻望屬車侍祠者數百人遐想漢儀之盛上壽曰  
千萬歲空馳虎拜之誠

代程樞密賀車駕幸祕書省表

虎觀鼎新復仰木天之壯蛻旌順動有光金匱之藏事  
歲崇朝禮超前代

中謝

臣聞編珠拱極憲東壁之經星羣

玉名山峙西崑之策府惟興國再臨於大駕逮祐陵愈

貴於上儀元元本本而宏達為羣巍巍煌煌乎卓絕之  
跡於赫右文之旦聿恢下武之聲定負雖酌於瀛洲它  
直尚僑於蘭若迺更爽塏肇建洪規揭寶墨於璇題帝  
中第一鳩環材於芸閣天下無雙親屈至尊式昭丕訓  
瞻八世宸毫之秘玩三王彝器之存褚得肉歐得骨虞  
得筋克兼衆妙夏之璉商之瑚周之簋仍獲餘珍坐使  
清流頃增榮觀恭惟皇帝陛下道隆息馬功濟興龍煥  
乎其有文章皇風載躋舉而措之事業治具畢張闡葱

藉於一時暢醇醲於四表先聖後聖大書特書臣辱在  
奉祠莫遑陪乘傳置郵之命幸此道之益高覩泰階之  
平與斯民而胥慶

代人起居太母回鑒表

聖主樂天復交懽於北境皇輿旋輒爰就養於東朝遠  
涉脩途言歸華闕極一人之喜豫罄万宇以懽呼

中賀恭

惟皇太后殿下道配坤元教形壺則邁徽音於任姒追  
淑範於娥嬋彤史揚休久嬪京而贊治赤光協吉遂毓



聖以開祥自玉輅之時巡奉禕衣而遐適薦縣歲籥越  
在鄰邦蓋聖人之德能通於神明而天子之孝克安於  
社稷皇乾眷命副九重長樂之思敵國行成脩萬世甘  
泉之好戒皇華而驂乘備法駕以回鑾正位慈寧遂即  
含飴之樂賦詩城賴敢辭舍肉之言臣等獲際昌期叨  
居輔郡傾心鳳闕幸脩清道之儀矯首龍庭恨阻奉觴  
之列

代宰臣進六曹寺監軍務通用法表

六官分職綜甲令以惟繁三尺裁書幸終篇而甫奏仰

塵聽覽采積兢惶

中謝

竊以帝奠九纒必有規摹之遠法

垂一代寧無前後之殊歲時既閱於推移可否滋多於

因革惟是文昌之要尤為政事之原上係朝廷倡紀綱

於九牧俯聯監寺列筦庫之羣司儻無一定之文孰究

兩端之弊中罹兵革浸紊簡書舉其宏綱未免口傳之

異視諸故府莫稽臆決之非懋建丕彝允歸華旦恭惟

皇帝陛下循堯治道廣文伐功上下相安品式已臻於

備具國家閒暇政刑宜底於修明細大觀之遺編作中興之寶訓蓋琴瑟不調之甚必解而張俾江河所犯之難不膠者卓部居有要凡目咸陳臣等獲預編摩久繇夙夜因時立制媿無山甫將明之材合古便今庶幾蕭何畫一之法

代張建康謝賜御製孔子七十二賢像贊表

細旃儲思述闕里之聖賢鴻筆垂光賁琅函於郡國濯冠拜況紆袂增榮竊以隆穎修肱仰素王之奇表攀麟

附翼萃諸國之異能播高躅於誦絃存憲言於竹帛孰

謂千齡之後獲逢萬乘之知雲漢為章像圖孔肖蜀都

繪壁初無當宁之褒唐帝擣辭不及升堂之列在古未

見惟聖迺能

中賀

恭惟皇帝陛下舞羽脩文解絃更化想

象環於往日宗木鐸之芳風玉振金聲發揮洙泗之美

銀鈎鐵畫度越義獻之前加寵校官匪頒寶軸臣猥司

留鑰恭覩宸奎七十子之肖仲尼悉經題品二千石不

如逢掖共慶瞻儀

代賀冬至表六

北宮擊磬庸知樂律之諧南至書雲益見豐年之象五  
緯相叶萬物昭蘇中賀恭惟皇帝陛下受命中興濟身大  
業聖人以天下為度同此疆彼界之仁斯民覩泰階之  
平享右粥左餐之樂當以舒之化景迎滋至之天休臣  
叨廩祠官養病里社振纓綏而接武莫陪上壽之班貢  
履襪而獻詩願納踐長之慶

疇人課密當五年再閏之期祕殿迎長上萬歲三呼之

壽

中賀

恭惟皇帝陛下得天之紀與時偕行無徧覆包函之殊以生育長養為事邇遐安集美宣王之中興廊廟榮華賢周公而大治臣衰遲多病叨竊叢祠莫陪鸞鷟之班徒深犬馬之戀

闔門候景茲審律於聽工登臺望雲遂紬書於往史

中賀

恭惟皇帝陛下聰明稽古慈儉保民能用真儒開八荒之壽域備成熙事變六樂於圓丘式踐升辰函蒙丕祉臣夙叨華綴久退私閤空懷頌履之誠莫預奉觴之慶

闔門以候景至式符巧厯之占御殿以聽樂均爰始黃  
鐘之奏迎玉琯一陽之復合嵩山萬歲之呼中賀恭惟皇  
帝陛下業濟化龍勛優息馬時則有若伊尹克咸同德  
之休王者莫高周文更廣好生之治升辰甫及景福來  
臻臣假守海邦遙瞻天闕踐長有慶願賡履襪之詩上  
壽多儀莫綴簪紳之列

氣和玉燭當芸荔之應期日永金鋪仰槐楓之留景斯  
名亞歲共祝萬年中賀恭惟皇帝陛下光啟宏圖力行柔

道寂爾干戈之偃粲然俎豆之陳上獵三靈之流嘉祥  
屢獲外連四海為帶比屋可封逢聖世之榮懷覺皇初  
之赳赳咸馳善頌式贊升辰臣叨領州麾遙瞻帝闕傾  
心葵藿已迎化國之舒矯首鵷鑾莫覲壽觴之舉

擊鼓撞鐘慶君臣之道得獻履貢襪迎天地之氣和斯

為衍萬之元仰慶呼三之頌

中賀

恭惟皇帝陛下兆謀一

旅式命九圍極兵寢刑錯之功洽喙息跂行之德效珍  
未嘗虛月垂穎屢以逢年惜大禹之寸陰踐長則喜受



有熊之神策介福無疆臣叨畀左符莫參上笏荔芸協  
序共知玉燭之調葵藿傾心遐想金觴之舉

代賀正旦表四

夏正三朝舉晉氏虎尊之禮春王一統布周人象魏之  
章玉燭惟和炎精有煥中賀恭惟皇帝陛下勲兼在昔治

致升平七十曰耄六十曰耆擊壤見斯民之樂四百里  
粟五百里米均田知我后之仁穀旦是臨椒花可頌臣  
奉祠里社聯職殿廬重坐說經身遠侍中之席九行上

壽心傾御史之觴

正月之吉始和治布周官之象千歲可坐而致禮稱漢

殿之觴

中賀

恭惟皇帝陛下仁行如春德盛在木彪列上

階之色蜩蝓左个之居去殺勝殘踰一星而治定植僵  
興仆光九葉以基隆時也求端天其錫嘏臣濫官南海  
遙拱北辰目見耳聞益謹朝宗之訓手舞足蹈莫陪上  
壽之班

漢殿陳儀樂正奏黃龍之戲晉庭制禮直臣開白虎之

尊惟上聖之履端宜百神之胙德

中賀

恭惟皇帝陛下指

麾戡亂目見迂衡恢復古之皇綱得用儒之治效握樞  
秉錄尊居蠖濩之中越契踰繩何取鴻荒之際受縣區  
之圖籍來殊徼之梯航三之日以是臨萬斯年而有永  
臣濫分魚契阻望鴈行上壽獻觴莫贊移葭之慶馳心  
存闕第深傾藿之誠

青達外震亶逢歲紀之端翠幄煴香咸仰朝儀之韞散  
皇風而隃領洽歡誦以呼嵩

中賀

恭惟皇帝陛下業類補

天思勤貳地摠神明之貺佑成道德之安強有并柯共  
穗以屢書聞狗吠雞鳴之旁達躋三皇而軼五帝懿鑠  
宣昭燭六合而耀八紘輝光充塞凡式圍而鼓腹俱擊  
壤以馳心穀旦甫臨椒花敢頌臣濫叨器使屢換斗杓  
如北辰而拱星深存華闕傾東海以為酒阻獻羽觴

代賀元會表

正上下之則講元會以尊王見天地之情慶人正之協  
紀禮超綿蕞光載簡書

中賀

恭惟皇帝陛下化廣人文治

臻儒效戴青旂於左个式對熙辰下彫輦於東廂薦行  
縟典萃諸道計偕之士肅殊鄰使命之班法酒序陳瑞  
章前列百神林從疑風馬之裴回九賓臚傳偉雲龍之  
璀璨君臣相悅皇帝知尊臣名綴叢祠身居舊里張鈞  
天之九奏遐想祲容環嵩岳之三呼莫陪大慶

代天申節賀表二

日永以正夏氣和薰律之中天命而生商業係蘿圖之  
固極華夷而抃蹈洽草木以光榮

中賀

恭惟皇帝陛下身

濟中興人逢上治以息兵之神武得享國之長年佳氣  
葱葱已信伯阿之望卿雲旦旦載賡帝舜之歌臣恨守  
魚符莫瞻龍表以九為節想漢觴謁者之儀則百斯男  
申堯壤封人之祝

皇乾眷而炎德輝誕開興運里社鳴而聖人出盡括珍  
符共堅戴舜之心遙貢祝堯之請中賀恭惟皇帝陛下艱

難系統慈儉保邦邁三代之英風補百王之漏典竹宮  
展采仰華星皎月之祥金匱奏篇集甘露華光之事天

錫無疆之祉人均有截之歡臣叨守邊城獲逢誕節觴  
稱萬壽知嵩嶽之三呼花覆千官想鈞天之九奏

代天申節貢銀狀

降年有永崇萬壽以無疆物土之宜罄四方而來賀退  
惟不腆敢瀆蓋高前件物朱提之珍番禺所湊地不愛  
寶叅厥包厥篚之輸天其用休薦如阜如岡之祉

代謝賜厯日表二

課清臺之厯雙壁五珠賜方國之書十行一札凡居臨

照得以奉行

中謝

臣聞兼天大地大而作王考旦中昏中

而布政惟統元妙一行之數斯具注示萬年之符恭惟  
皇帝陛下聖克憲章效隆調一義宅南而和宅朔法帝  
堯之授人時趙舉春而倪舉秋納魏相之陳月令冒海  
隅之出日靡天下以向風臣敢不仰體愛民深思率職  
周旋以守弗墜鳳司之頒析隕有經式安龍戶之舊歸  
三統一元仰清臺之課密五年再閏協左氏之歸餘中  
出穗書遠霑竹使

中謝

臣聞作雄鳴雌鳴之律厯法遂萌



建南正北正之官疇人有述亶惟昭代高出舊章恭惟  
皇帝陛下侔德商周措時夏子居域中之大以天下為  
家三階平而風雨時不爽璣衡之政五星聯而日月合  
有開珠璧之祥臣敢不恭體授時深思奉職左旋右轉  
既天道之可知東作西成幸農祥之不爽

盤洲文集卷三十五

欽定四庫全書薈要卷一萬五千七百八十六

集部

盤洲文集卷三十六

宋

洪适

撰

表十六首

代張提舉謝立祖廟表

額曰旌忠

真主念功必賜鼎銘之美大門徇節遂膺廟食之褒風  
動邇遐感均存沒

中謝

伏以遼東奉祭彤之祭匪出九重

章武立田氏之碑但循甲令躋聖世旌忠之典酌禮家  
勤事之文國有條章人知砥礪伏念臣先祖具官臣某

蚤因文翰服在周行嘗荷橐於宣和繼剖符於南鄧朔  
邊烽舉分四道以勤王赤縣颺回無寸兵之傳堞身獨  
嬰於白刃血屢涂於左輪會廷臣請存趙而不諧故敵  
國俾秣燕而遠去遽傳長畢不見中興藏黃石於異鄉  
已多丘木嗣蓼莪之宗器未實汴毛方諸父之拜章自  
上天而降札建其閼宇錫以嘉名尸亡裹草之還石有  
麗牲之啟仰瞻奕奕之作遂假言言之靈三穰寧侔九  
京有曜結草豈殊於今日傾葵相誓於私庭此盖伏遇

皇帝陛下濟業艱難納民仁壽坐格明良之遇每先忠  
義之思恩過禁樵激卞彬而敢謝歎興茂柏欲裴邃之  
更生有大炁之詔具存非諸布之名不顯傳之千載光  
此一門臣內省材駑仰慚祖武偶備員於使指得貢牘  
於宸嚴子孫不忘已篤傳家之報邊豆有楚長堅許國  
之誠

代陳饒州謝到任表

引疾去朝甫遂漳濱之卧冒恩典郡復成番水之行班

祿云初凌競曷措

中謝

伏念臣畧無他技久在常流當桂

管之名還以芻言而入對溫顏曲獎朽質殊榮俟罪長  
沙未奉三年之計牧民南海已成百舍之裝會神聖之  
更張雜智愚而並用昇輔郡股肱之寄易計臺耳目之  
除脫彼瘴烟近於天日而臣浸嬰犬馬之恙闕趨鵷鷺  
之行本草石之寒溫但知救死問錢穀之出入積致瘵  
官不勝據蒞之憂游瀝負薪之懇拜鴻私之從欲進華  
閣以就間方視蔭於窮居忽承流於舊服官曹不改初

無勿翦之棠筋力既憊非復能鳴之鴈政茲求瘼難以  
養疴茲盖伏遇皇帝陛下奮發乾剛財成泰道勵精理  
國每未明而求衣軫慮字人故嘗夜不安枕乃知孱瑣  
亦玷選掄臣敢不整頓前規鞭驅縣力僮子歌宣布之  
頌可謂逢時庶民無愁歎之心尚期校考

代魏吉州謝上表

冒恩起廢敢辭蜀道之難改命承流頓覺長安之近欣  
初班錄采切戰競中謝伏念臣學不通方器非適用自離

羣於棘寺久遠迹於楓宸畫戟兩州效茂聞於愷悌繡  
衣三組志尤慙於澄清偶刊訓解魯論之書中有感歎  
周公之語言者謂其訕上理官坐以投荒窺白澤之圖  
屢逢魑魅染黃茅之瘴幸免膏肓遇聖政之改絃致流  
人之出籍方作捫參之計又叨易地之除惟廬陵之古  
城乃江西之劇郡潢池賣劍偶逢劉啟之稀白粲連檣  
咸懼轉輸之闕顧惟謏薄恐誤使令茲蓋伏遇皇帝陛  
下發政瞻前澤人重外欲庶民之安田里如彼漢宣故

丙夜之思姓名不殊唐帝豈容駑乘亦玷獸符臣敢不思補一毫恪遵三尺盡心聽訟庶移珥筆之風竭力運糧會有積倉之日

代辰州守謝到任表

拜散人江湖之號方遂歸耕分刺史菟魚之符誤膺出守遵瓜時而就道差穀旦以臨人

中謝

伏念臣資不逮中

況惟每下未足三冬之學偶聯千佛之名既備數於薦紳遂服勞於簿領幸清明之盛際雜巧拙以兼收猥以



駑材廁於駑綴可以折獄歷廷尉之三官何自為郎點  
司刑於六屬昨緣盈滿旋即退休一去日畿三移星厯  
上棟下宇獲安故里之居右粥左餐仍竊叢祠之祿豈  
云出綽乃得把麾惟盧溪之偏城本黔中之古郡丹砂  
化藥有地產之延年青箬裹鹽無洞丁之奸命使之作  
鎮宜擇惟良恭惟皇帝陛下化尚中和治貴清靜用真  
儒而無敵不復談兵以佚道而使民率皆樂業濫令鬼  
瑣亦職藩宣臣敢不內竭技能仰酬器使法西都之循

吏庶凝共理之功訪酉陽之逸書少補右文之治

代福州守謝到任表

三載典城方軫黜幽之懼七條易地采深聞命之驚甫

見兵民已頒詔令

中謝

伏念臣空空能薄汎汎品卑蚤瞻

咫尺之威屢懷方寸之印自飛芻於五莞斯視蔭以八

年就戍西偏偶洞蚤守條而纍化徙官東表媿仙羊感

政以效祥雖駑馬之十駕自鞭顧鉛刀之一割已鈍賴

堯曦之暨遠亘粵分以移風佩犢帶牛丕變潢池之習

羹魚飯稻洊逢樂歲之豐致此孱疎安然糜竊揆罔功而夕惕恐大譴之日加敢料恩私復垂任使惟閩川之要屏邇岳狩之行都地大俗繁務叢物阜必謀忠信慈惠之長可歌宣布中和之詩深慮器盈有辜轂遺茲蓋皇帝陛下憲章邃古光演寶圖鑿井耕田措斯世於安寧之域辭軒罷刃賢周公而榮華至今既大振於朝綱每廣求於民瘼謂臣久居遐遠而遷之以近知臣稍更繁劇而勉其所長自非竭一得之愚何以答十行之賜

寵光若此驚塞若何臣敢不材罄夙宵憂分旰晷廣上  
聖仁心之澤務在撫摩師前賢治道之言期於清靜

代雷州守謝到任表

惕日曠官幸免

闕

龍之譴治雷調守海叨銅虎之榮遵

爪戍以入疆見葭萌而宣化

中謝

伏念臣顓蒙瑣質握齟

常流儲慶仙源顧邨霍出文昭之後策勛聖域慚向歆  
為漢雋之宗蚤綴迹於薦紳即抗容於簿領頃紆邦紱  
邈在海濬佩犢何為帶牛盜蹤偶少問羊然後及馬政

術莫知深懼罷歸幸臻善了非上聖廣親親之大賜則  
微臣考下下以何疑方俟授閑庶幾補過敢意十行之  
寵復尸千里之權惟南合之小州蓋徐聞之古郡波涵  
渤澥帆檣可達於羣蠻利足魚鹽井邑已同於中縣式  
塵共理迺鑒匪材此蓋皇帝陛下功光祖宗德合天地  
濟艱難之丕業題宴粲之昌期念大分八百國之封寔  
先同姓有唯良二千石之慮欲又遠人致使卑凡竊司  
班錄臣敢不盡遵甲令以治仰寬丙夜之憂公族之應

振振弗忘古訓君子之風廩廩力企前脩

代謝赦文

鑾輅就乾已報功而饗帝雞竿作解爰斂福以錫民凡  
在式圍率同擊壤

中謝

恭惟皇帝陛下批糠巢燧冠冕農

黃匱武興文不膠馬上之治制禮作樂式展升中之祠  
嶽祗下而瀆鬼從地垠開而天閭決六甲既迎於黃氣  
一蜚豈泄於青蠅合動籥之前言鄙封錢之小慮覃此  
蓼蕭之澤脫然叢棘之囚率土昭蘇羣情滌濯濫司郡

寄獲廣上恩札布十行仰湯后解網之德罪寬三細體  
成王空囿之隆

荊門謝到任表

舊鄉學稼久號龍具之中昭代振淹忽玷虎符之末遵  
期上道涓日備員中謝伏念臣生也無庸少而自苦駑材

僥倖同介弟中詞學之科天語褒嘉稱先臣獲忠孝之  
報驟躋儒館始接英躔暨禿節之來歸蹈駭機於不測  
而臣屢緣父命前詣相門達危疑欲去之情掇猜忌不

回之怒既佐郡甫終於兩考偶投荒正值於斯時守臣  
觀望以中傷御史憑依而論列獄辭既上乃散法而卻  
回吏議不公即舞文而求合錮廢已繇於一紀清明斯  
覩於三光惟當陽君之故區在雲夢澤之西鄙雖承平  
之風未復而醇厚之俗不移苟無貪吏之誅求便有樂  
郊之氣象深虞瘼曠直抵譴何茲蓋皇帝陛下覆物如  
天視民猶子遴侯邦之左契錄治行於御屏下詔百官  
欲迭居於內外承流六服寧有間於邇遐凡此博求未



嘗輕授載惟異渥猥及私門追歎九原出明綸而賜諡  
召還二季躡清貫以登朝當宰輔之進除書顧姓名而  
勤聖問念無是似之質莫稱非常之恩銘骨自期粉身  
何補臣敢不仰思旰食力效秋毫宣布恩隆常佩七條  
之訓撫柔凋瘵敢輕一障之乘

賀郊祀表

蒼駟六虬款頌祗而拜況園壇八陛慶掃地之揭虔熙  
事崇成衆心交忭中賀切以七政以齊而輯瑞稱類帝之

彌文四卜不從乃免牲紀就郊之過舉於皇昭代何算  
陳編恭惟皇帝陛下上聖凝姿中天立極藏干戈於既  
定其興也淳焉解琴瑟而更張不膠者卓矣自政機之  
獨攬茲樞燎之載颺玉梢璆磬以諧音蘭酒柘漿之備  
物靈旂來下瑞譟光前坐宣室以受釐御端門而肆赦  
臣耳聞錯事身阻侍祠舉相如數十人作歌無庸馬走  
若兒寬千萬歲上壽有羨鵷行

謝赦表

八音之調作歌禮成繭栗五刑之疑有赦澤動雞竿凡

在堯封率同虎拜

中謝

恭惟皇帝陛下恩周地軸治叶天

璣總攬權綱振孝宣之治道周章黼黻講元鼎之祲容  
壇奉玉以臚驩府封錢而肆青鑿井而飲已騰寧壹之  
歌畫地為牢共迓空虛之慶臣甫承人乏獲布上恩戒  
此遐萌啟良心而遠罪奉茲輕典副盛德之好生

賀皇帝慶皇太后八十表

進壽東朝宣恩北闕殿上皆稱萬歲瑞應非常海內之

凡九州歌呼同慶

中賀

臣聞喜黃髮而頌壽母魯國有詩

摘紫房以和慈顏晉人自賦若長樂備常珍之奉在前  
王無故事之傳恭惟皇帝陛下道大興商功光系漢日  
致其孝有曾閔事親之風帝降之祥得黃老養性之福  
雖蚤朝而晏罷必夏清而冬溫逢八十春秋之尊出五  
三經籍之右吹律式迎於首祚舉觴遂介於長年歡連  
宮闈澤洽黎庶比屋起南陔之養瑤池呈西老之符興  
慶之率百官曾非曠典建元之復三算何算陳編臣遠

守小邦側聞盛禮迴鑾紀事微蹤常錄於汗青賜札錫  
民異渥獲推於戴白

賀皇太后慶八十牋

慶歸慈壺禮講壽觴鍊石以來孰爭年於彤史呼嵩所  
暨咸播澤於黔黎

中賀

恭惟皇太后殿下德範光前仁心

及物比任姒跡助文謨武烈之興好黃老言得天長地  
久之應方聖主極怡怡愉愉之養宜皇乾錫穰穰簡簡  
之祥式對三微仰稱萬壽黼黻斑衣之樂秬糠黃髮之

歌寶殿騰歡龜臺獻瑞七十曰老已誇古昔之希八千  
為春永受適遐之祝臣博觀載籍未睹異聞恩在私門  
記卷簾之殊渥儀分廣陞想貢牘之清班

代賀皇帝表

喬雲結幄爛南極於紫霄元日稱觴介東朝之黃髮郵  
音所寄嘉頌載騰中賀切以有三足烏說西崑之戴勝鍊  
五色石聞上古之斷鼇已標仙籍之長生或播皇風於  
不朽慶縣長樂事始昌辰恭惟皇帝陛下聖稟姜任行

齊曾閔問安視膳蕃釐專鄉於媪神據德依仁介福鼎  
來於王母禮行膝下歡匝宮中八千歲春方百分之及  
一十七代史比萬壽以無雙臣遠使重湖與聞曠典仰  
泰階而肅序厥路無繇祝坤極之增年後天而老

賀天申節表

日永星火以正夏玉燭咸和電繞斗樞而照郊金鋪有  
慶浮邇遐之喜氣集高厚之麗禔中賀恭惟皇帝陛下濬

哲提躬勤勞濟業天連珠而合璧民擊壤以登臺日躬

攬於政機更力行於治道按六經而校德方駕義農稱  
萬壽以獻觴齊蹤彭老臣叨居小壘阻造廣庭心慕堯  
封不勝多男之祝手披魯頌乃賡台背之章

天申節貢銀狀

九夏乘離千秋迎節雖下陳之封畧有上壽之章程前  
件物涌地效靈瞻天贊慶介荊州之三品不添方輸匪  
朱提之一流難叅庭實

謝賜紹興二十九年厯日表



遠推竹律據易道以歸奇中出穗書亘坤輿而班朔雖

為常憲時謂新恩

中謝


竊以命南正北正之官厯翁道始

積大餘小餘之數厯法可求惟昌辰革乖次之非故大  
紀得厚生之善足詆孟陬之殄豈差大火之流恭惟皇

帝陛下欽象衡璇齊尊曜魄張登三之治具受衍萬之  
休符好雨好風轉破塊鳴條之沴若煙若霧睹連珠合  
璧之祥既成歲以定四時蓋次春而大一統遂令共貫  
咸得開編臣名綴典城職當宣化奉行政典敢干木鐸

之刑勸飭農功庶獲火耕之效

盤洲文集卷三十六



總校官進士臣胡

榮

校對官編修臣方

煒

謄錄監生臣蔣予林

欽定四庫全書薈要

集部

盤洲文集卷

三十七至  
四十

詳校官助教臣謝登雋



欽定四庫全書薈要卷一萬五千七百八十七

集部

盤洲文集卷三十七

宋 洪适 撰

表二十三首

謝賜御製損齋記表

盤洲文集

好易玩山澤之立辭睿藻名齋揭日星而垂象迺

刊琬琰溥及簪紳臣

中謝

竊以六位成書有數家之口授

四方觀化必當宁之躬行與其考梁丘朱鹿之異同何  
以益黃帝堯舜之平治仰九五聖神之學束三萬訓故

之言恭惟皇帝陛下道續緝熙理潛易簡據狼弧蹈參  
伐而神武不殺卻處妃屏五女而清靜無為鉤探義文  
室侈目蕩心之欲品評唐漢監持盈守位之非爰標榜  
於宸居獨踐修于損德翠不裂而璫不族盡草紛華墨  
之妙而筆之精它無嗜好著寶奎而襲六合太極之函  
三風動邇遐日趨敦朴臣恭銘座右已秘校官今祿利  
而學者不明共慚童習自奉養之君子有節上法聖謨

知徽州謝到任表

叨拜言綸復分符竹繇小壘而升輔郡去遐邊而接故鄉責重弗勝恩隆難述

中謝

伏念臣弱材無似末技易

窮頃獲戾于權臣即問耕於田父起廢忽臨于一陣備員甫歷于三時體鴻雁勞來之章竭駑駘鞭策之力政無善狀偶見取於疲民辭至外臺遂共騰於需牘豈期茂渥有此超除尺五去天望觚稜而甚近夫三為屋指井邑以相隣惟富州擇吏之不輕恐譴域詣曹之莫免茲蓋伏遇皇帝陛下德游和氣澤播黎苗方循名責實



之朝寸長必錄故宣化承流之選詳試所行欲察字眊  
不嫌易地臣敢不究心簿領率俗農桑對以春秋願奉  
典城之計著於甲令益圖報國之忠

謝赦表

凝旒行孝方視絜於慈闈貫索韜光遂解除于密網恩

波匝宇罪黨虛罔

中謝

恭惟皇帝陛下德過舜文行高

曾閔自遠迎於駟駕常款戲于斑衣問安否之何如偶  
愆調護禱神祇于上下必底康寧亟圖勿藥之功復沛

蓼蕭之澤仁心宥過和氣致祥臣連玷左符並逢曠典  
二算之復八十已敷惠于遐萌五刑之屬三千今滌瑕  
于茲土願哀吉語永介壽祺

大行皇太后上僊慰表

釁生慈壺痛貫宸衷奉諱之初提封同戚

中慰

伏以大

行皇太后生全五福德洽六宮三母翼周播徽音而並  
駕一成祀夏誕聖質以中興方期壽祉之增忽愴僊遊  
之隔恭惟皇帝陛下得虞舜事親之道極文王問疾之

憂念駟馭之艱難養加於孝逢棘風之變故情過乎哀  
願寬罔極之悲式體系隆之重臣限以官守不獲奔赴  
闕庭臣無任

顯仁皇太后祔廟慰表

栢城襄事隔慈景於東朝壓主寧神講嚴禋于清廟凡  
居覆載靡不悲懷中慰恭惟皇帝陛下養尊母儀情深  
孺慕五表而臨素幄罔極哀悰九虞之奉真游弗純吉  
服逮茲登配益感劬勞願抑凱風寒泉之思以慰普天

率土之望臣限以職守在遠不獲奔詣闕庭

謝賜紹興三十年曆日表

叙書則斷堯典虔授民時言天者以夏正茂明曆法妙

於推策欽若統元

中謝

恭惟皇帝陛下受籍求端握符

行健在璿璣以齊七政徇木鐸以戒百官太史司日月

之行不差宿離鴻範著天人之應時若燠寒臣敢不仰

體深仁恪思共理教下民之農事復當火紀之朝考要

說於術家有慶金穰之歲

賀立皇子建王表

選建宗英行真王之故事救寧邦本繫率土之羣心凡  
屬照臨舉同呼舞中賀恭惟皇帝陛下系隆漢統彊固  
周宗陳王業之艱難永懷藝祖辨廟祧之昭穆不私本  
支蚤求繩武之賢久茂積身之德若古有訓惟斷乃成  
一索得男名協滄雷之象衆星共北光騰左轄之纏復  
塞嫵萌益高聖慮臣猥臨近郡獲拜細書歌螽羽之詩  
慕華封之善頌作燕謀之祝慚枚叟之逸才

謝賜御書手詔表

方底再封制官刑而出綽周行九命誦睿藻以書紳具  
瞻雲漢之光交積淵冰之懼臣

中謝

伏以三風之戒徇

貨若稽湯后之謨八灋之糾治邦詳著周人之典蓋驕  
驚不通古今則安能應變期會不報簿書則何以責成  
或舒緩以養名或拱默而尸祿迺居官無黔突之計受  
祿有伐檀之譏皆軫慮于冕旒遂成章于筆墨流傳所  
屆廢格有誅恭惟皇帝陛下弊革賄交務先政核六事

謝苞苴之責百篇等訓誥之文罷蠙淮之魚德高禹貢  
去稗田之騰指合周詩風移當自於身修奎采復盼於  
心畫臣久違朝籍猥守王畿絕密嶺而斷楓香願攀任  
昉問馬曹而招竹隱敢效徽之

謝賜紹興三十一年歷日表

璿璣齊以七政鳳歷奏篇攝提正于孟陬龍躔更始同  
文所暨承式惟虔中謝恭惟皇帝陛下道妙範圍仁周  
動植疇人維候最密清臺之書正月始和若觀象魏之

灋紀中興而有永極廣覆以相傳臣職忝承流榮霑賜  
札永惟五紀欲斂福于編氓必使三時無輟耕之游食  
提舉浙西常平謝到任表

支郡理人已殿道州之考外臺置使驟膺司部之除入  
境云初逾涯是懼

中謝

伏念臣品卑馬走用黔雞尸洊

分符竹之榮蔑著涓塵之效在外十九年矣清班已隔  
于修門取禾三百廬兮厚祿敢期於近甸忽叨出綽遂  
使登車致萬鍾之藏久見欺於鼠雀開一廬以賣方井



按於狐狸正積弊之剷除宣弱材之堪任茲蓋皇帝陛下更張治具曲播人材朝令夕行智兼叔于羣策叔出季處恩不替于一門乃若皇華付之駑品臣敢不馳驅郡國宣布詔條發粟以賑貧民何須矯制乘傳而張空簿孰敢效尤

代朱丞相第三辭免表

秉鈞虛受深懷覆餗之憂批詔游盼尚闕循墻之請輒控再三之瀆庶幾萬一之從

中謝

伏念臣識不炤微器

非任重浸執股肱之政畧無根柢之容報上闕焉省躬  
惕若方大明更化已臻琴瑟之調而中昃傳餐頗軫甲  
兵之問若時枚卜衆所具瞻豈容測海之蠡可備濟川  
之楫月三日而成魄誼合辭盈階六符以觀天理難代  
匱伏望皇帝陛下俯垂公聽亟降可音不嫌渙命之還  
俾免師言之誚姚崇成天下之務別選能賢汲黯寢淮  
南之謀必期益國

江東常平謝到任表

影瀾部之纓勵能信宿乘楚人之傳復冒殊恩甫入疆

封未知職守

中謝

伏念臣蚤緣薄技嘗綴清流逢凶德

之擅朝踵親闈而去國歲一章之在外瀕死而生車兩  
輻而居前眎今非昔忽出綸于中禁得攬轡于內畿草  
酤權之姦詎能興利理牢盆之策方欲求端偶同產之  
典城致孤根之易地四牡勞來于周道既榮文石之登  
六鷁退飛于宋都誰謂觚稜之遠迹未陳于棠舍官復  
在于桑疇雖過家諧上冢之私豈奉詔有察州之效所

憂短力必抵大何此蓋皇帝陛下責實人羣留神國用  
棟梁枅拱隨小大而度材金穀米鹽均邇遐而置使有  
如臣者亦在遣中臣敢不靡鹽夙宵徧行郡邑問幾何  
於庾氏仰副玉音通什一于商人少裨金府

欽宗皇帝升遐慰表

萬里蒙塵咸俟翠華之返一朝厭代已成碧落之游音

諱遠來哀摧罔極

中慰

恭以大行孝慈淵聖皇帝堯仁

舜孝禹儉湯寬位登九五之尊時逢百六之會重羣美里

之易久矣明夷迷襄野之途期于傾否遂傳脫屣永斷  
回鑾恭惟皇帝陛下仰紹君臨內懷友愛陟彼岡而瞻  
望恨隔終天抱其弓以烏號痛深叩地願講反兵之報  
少寬當宁之悲臣限以官守不獲奔走闕庭

賀明堂禮成表

布政頒時粢梓謨於汶上稽經諏律蒞祀典于宮中豐  
澤既行綿區同慶

中賀

恭惟皇帝陛下孝存嚴父禮謹

事天三歲親祠屬有甲兵之問六飛儼處弗陳鑿輅之

容況當越紼之時亦損垂裳之飾笙磬設而不作粢盛  
絜而益虔事有權宜靈斯悅豫臣身拘乘傳心在執邊  
授五篇之詩媿漢儒之難及右四方之嘏幸周頌之可  
歌

明堂貢銀狀

蒐越紼之儀九筵陟配謹執邊之職萬寓駿奔前件物  
貨出朱提品非白撰稽舊圖于公玉已頌我將省內府  
之酎金庶逃邦憲

謝赦表

明堂度九尺之筵應房心於穹漢天下亡一人之獄流  
雨露之湛恩凡在式圍率同擊壤中謝恭惟皇帝陛下  
輝光周頌度越帝圖涓吉日於杪秋講多儀於路寢禮  
成奠璧已嚴父而配天澤播封錢何為牢而畫地臣獲  
聞熙事猥綴外臺鼓舞鴈鴻慶漏泉之大青奉行寬卹  
懲掛壁之虛文

車駕回臨安起居表

鳴葭近甸俯臨細柳之營回軫離宮何取長楊之獵百  
神迎蹕萬寓騰歡

中謝

恭惟皇帝陛下業濟艱難志圖

清壹淮陰已縛非高祖偽雲夢之游獵狔既平宜宣王  
復文武之士欲講清廟升祔之禮不憚屬車來往之勞  
天克相於吉行民不知夫順動臣幸因使指入拜威顏  
從駕在豹尾中無階扈聖快心於狼望北尚冀銘功

欽宗皇帝祔廟慰表

靈駕來遙緩七月因山之制禮官踵故講九虞祔室之



儀覆燾之間悲摧罔極

中慰

恭惟皇帝陛下念深鵠翼

恨絕龍髯篤義復讎啓周人之白旆從戎下詔同晉國  
之墨衰方緣江而視師為升廟而回蹕嚴禋之際宿憤  
已攄即聞卜洛之期斯慰陟罔之孝願裁戚抱式徇輿情  
欽宗皇帝小祥慰表

蒼梧不返正瞻望於靈輶新穀既升已變更於緹籥凡  
居臨照同盡攀號

中慰

恭惟皇帝陛下承續丕圖盡傷

遠狩因心則友履霜露以纏悲折馘而還封鯨鯢而示

報茲逢練祭願抑哀情

車駕視師起居表

百將爭馳必推鋒而滅寇九存順動欲按轡以勞軍喜  
氣騰空祥光護野中賀恭惟皇帝陛下振威撥亂發憤  
罷和坐滅凶頑乃帝王以全而取勝仰符天意蓋春秋  
尤大於復讎蒙犯祁寒勤勞清蹕茲周行於壁壘即光  
復於京都臣斗食無功咫尺顏在望負羈縻而巡天下敢  
齒執殳有壺箠以迎王師竊思馮軾

謝賜紹興三十二年曆日表

居卿底日以南正而思天治歷明時非魯人之失閏紀

元有永賜札惟榮

中謝

恭惟皇帝陛下德煥炎精氣調

玉燭校疇人之踈密得神筭之本元正朔所加暨中原

之舊郡鑾輿斯動考吉日于叢辰臣乘傳備負開編謹

始橫行被敵年新數于中興平糴利民歲必觀于上熟

提刑司謝賜曆日表

歸竒象閏大衍之數可推乖次失方孟陬之躔已正札

書所賜縣宇爭傳

中謝

恭惟皇帝陛下政叶璣衡明齊

曜魄羲宅南而和宅朔法帝堯之授人時趙舉春而倪  
舉秋納魏相之陳月令冒海隅之出日靡天下以向風  
臣偶以攝空游茲拜况好生惡殺體任德而省刑力耕  
數耘期啟民之樂業

顯仁皇后大祥慰表

坤載雲傾痛栢陵之永閔喪期有數驚駟隙之如馳

中

慰恭惟皇帝陛下孝德無加哀情罔極臨朝而慕不忘

問寢之時肆青所行尚軫稱觴之澤茲逢祥祭橫集悲  
悰願欽對越之靈式徇廓然之禮

盤洲文集卷三十七

欽定四庫全書薈要卷一萬五千七百八十八

朱部

盤洲文集卷三十八

宋 洪适 撰

表二十二首

戶部員外郎淮東總領供職謝表

乘傳倉臺久叨榮於卿部綴員郎外遂董餉於軍門下

拜頂恩疾驅莅職

中謝

伏念臣耳聞不廣心計甚疎迹

遠朝班失登瀛之故步官慚使指竊鬻海之虛名頻年  
獲覲於清光仍世俱霑於異渥家聲有忝處雁序而不

能鳴天語屢褒謂駕材之皆可用故茲推擇驟出等夷  
方高宮祐再造之機而英斷講萬全之策增淮瀆之幕  
府下海道之樓船七萃雲屯舉張頤而代哺千金日費  
難拱手以蒙成欲宿飽之可期固空餐之是懼茲蓋伏  
遇皇帝陛下規恢故境選擢羣材細柳屈帝尊惠已深  
於挾纊前茅戒軍政人自樂於推鋒念足食乃能足兵  
已治內然後治外猥令最品姑試事權臣敢不慮在乏  
興勉旃代匱乘此寇衰之勢少佐武功竭其父教之忠

不為文具

太上皇帝內禪賀表

睿斷無前寶圖有託慶繇宗祏瑞發乾以

中賀

恭惟太

上皇帝陛下臨照四方憂勤三紀開儲禁非懇切之請  
巽大位於間暇之時殺單于而敗單于據高文之憤矣  
家天下如官天下法堯禹而兼之樂哉別宮釋此重負  
臣偶分外寄莫綴末班徒傾微藿之忱第祝大椿之壽  
皇帝登寶位賀表



虔遵中詔光御丕圖四方歸心千載接統中賀恭惟皇

帝陛下聰明稽古仁孝承祧天之歷數在躬重華協帝  
王有聖德受命下武繼文規恢再造之功鞏固無疆之  
祚臣名叅郎位職闕轅門徒馳拱極之誠莫預呼嵩之  
列

登寶位貢銀狀

伏以龍飛御極既天德之有開虎拜奉珍豈王人而可  
闕前件物載諸禹貢掌在周官涌地效祥敢叅三帛之

贊旅庭率職深慚九牧之金

謝登極赦書表

日月合明仰大君之繼照雷雨作解洽盛德之好生驩  
然有截之區覃此非常之霈

中謝

恭惟皇帝陛下誕膺

天命光宅帝尊增重規疊矩之休行破觚斲珣之政問  
安視膳傳治國之仁心施惠布恩薰空罔之協氣臣幸  
因使事獲拜札書獄亡一人頌已騰于廣陌畿方千里  
覩茲快於速郵

太上皇帝上尊號賀表

發揚聖德膺受徽稱誦日播傳望雲呼僊中賀恭惟太

上皇帝陛下居域中之大以天下為公位既正于青宮

心遂輕于黃屋鬱鬱葱葱之氣久著休符巍巍蕩蕩之

名永光顯冊乾坤合慶宗廟產祥臣遠採異聞難形鉅

美事高堯典六五帝以垂鴻誠擬華封八千春而介壽

賀皇帝上太上尊號表

考古先之閭典崇太上之尊稱傳命詔函騰歡坤軸中

賀

恭惟皇帝陛下纂堯之緒廣文之聲五日一朝未伸  
業業之孝千秋萬歲欲顯巍巍之名乃揆休辰式加明  
號祝壽齡之綿永彰聖德之輝光臣迹滯江濱心馳日  
下望丹墀之九級效喬嶽之三呼

賀會慶節表

舒虹紀節日在析木之津翔鳳騰章下獻南山之壽

中

賀

恭惟皇帝陛下繼明疊矩受命迓衡傳位非漢唐踵  
二皇之遐武事親若曾閔得萬國之歡心初開長發之

祥共上無疆之祝臣名塵省戶身限都門鵷鷺分行莫  
蓬班庭之列岡陵介祉第深在闕之誠

謝賜隆興元年厯日表

真主履端七政在璣衡之器疇人課密萬民觀象魏之  
章覆載無私奉行唯謹中謝恭惟皇帝陛下誕膺駿命  
光宅丕圖元年者君之始年春秋乃承于天意九服其  
外曰蕃服正朔已加其國人式頌厯象之文咸識旦昏  
之候臣猥司外計例拜新書雖有考於王正顧何知於

帝力

賀天申節表

業隆化馬喜脫屣于繁機節紀流虹納垂紳之嘉頌中

賀恭惟太上皇帝陛下希夷合道昌熾錫符宮室安安

可笑新豐之築神祇擁右不勞方丈之求彌月斯臨後  
天有禱臣猥司軍饗莫綴朝班錄金鑑而上十章具存  
彝訓奉玉卮而稱萬壽胥慶緝儀

欽宗大祥慰太上表

瞻蒼梧之野尚結愁雲廢棠棣之篇洊經旬歲哀纏情  
而無盡禮順變而有終中慰恭惟太上皇帝陛下望斷  
龍顏愛敦鴈齒書謂之五典已分天下之憂喪不過三  
年遂畢聖人之孝願寬悲愴以對榮懷

又慰皇帝表

朔方遠狩悵未返於龍輶西汜疾馳驚再更於葭律悲  
纏當宁恨結羣編中慰恭惟皇帝陛下甫協帝華如繩  
祖武策士罷臨軒之禮復讎興出塞之師寒往暑來遂

畢三年之祭乾旋坤轉竚諏六緯之儀願豁聖情以尊  
神器

賀會慶節表

月管就盈時既和於玉燭星樞紀瑞慶斯會於金鋪凡  
在九圍共祈萬壽中賀恭惟皇帝陛下聖明繼代勤儉  
宅尊披輿地之圖欲規恢於禹跡歷中天之載實符合  
於漢興誕節再逢頌聲四起名叅郎選職典軍須竊比  
華封願祝流虹之祉仰瞻魏闕莫陪虎拜之班



賀立皇后表

吉協著經儀成椒屋星軒絢綵地軸臚驩

中賀

竊以二

南為王化之基六職修陰令之事必登建於邦媛斯昭  
著於皇嬪彤史所書芳圖可鑑恭惟皇帝陛下重華協  
帝先治齊家崇九廟之嚴裡竭兩宮之孝養再歲已勤  
於內助中闈未奏於隆名遵太上之訓詞備有司之典  
冊倪天所命遡日為明太姒嗣徽音益顯太任之德長  
秋正坤極永承長樂之顏臣出掌軍須側聞國慶祝聖

人之多子竊效堯封歌淑女之進賢何慚周什

賀皇后牋

發祥龜筮正位宮闈歌二南采芣之詩備六服禕褕之

禮中賀恭惟皇后殿下明章淑範肖似徽音大練厚繒

法陰馬中興之后重侯累將鄙宣元外戚之家坤極既尊母儀可仰臣方司外計莫綴末班慶椒掖之禮成傾葵心而頌作

賀太上皇帝表

乾剛繼代爰契聖心坤則正名更勤慈訓禮成今日慶  
出陳編中賀恭惟太上皇帝陛下等邃泰元凝神道妙  
幾年薦舜邁盛德於帝勛三母翼周示美音於太姒章  
宮中之婦順作天下之母儀臣偶縛微官竊聞縟典班  
莫趨於九級化益詠於二南

賀壽聖皇后牋

祥開穀旦儀講椒塗具嘉慶以無前仰徽音之有續  
中  
賀恭惟壽聖皇后殿下景鍾撰德沙鹿垂光夏之興也

以塗山助成寶業葛之覃兮于中谷允蹈聲詩茲選建  
於副禕益怡愉於長樂臣職供外間身隔上都敢哀擊  
壤之謠用繼覲天之雅

謝除司農少卿表

分職供軍每懼乏興之譴絰名司稼更叨因任之榮力  
短無庸恩隆曷報中謝伏念臣螢光弗遠鼠技易窮偶  
竊郎曹之稱來專餉道之事逢時多壘尸祿再暮興十  
萬師則費千金況增禁旅率三十鍾而致一石遠出淮

瀆東遷內附之遺黎北受來歸之別種市租輸入幕府  
茲事蔑聞衣食仰給縣官其人愈衆常虞不足之患徒  
辱非常之刑華衮自天忽得有勞之獎列卿惟月遂塵  
不次之除重拜綸言彌光使指深思激勸獨誓靡捐茲  
蓋伏遇皇帝陛下德盛協華政先核實整軍經武內堅  
再造之誠任賢使能兼出萬全之策雖輸平而款塞益  
嚴備以防邊不弃斗筭之材庶終尺寸之效臣敢不搏  
節出內防閑弊欺峙三遂之芻茭瞻前敢闕問一歲之

錢穀善後是圖

謝賜隆興二年厯日表

泰階陳六符之經若稽要說玉燭調二年之厯誕布新  
書賜札為榮開編有考

中謝

竊以驗之天道則有分至

啓閉之叙施之人事則有析因夷隩之宜明主求端南  
向謹中星之候疇人失閏西流差大火之躔課密奏篇  
統元貽憲恭惟皇帝陛下德參穹壤政法陰陽行夏之  
時不爽孟陬之紀紹堯之後復修暘谷之官荐居正以

次春始歸餘而成歲臣例叨頒朔未獲朝正名玷穢臣  
義實慚於九扈職專饒道積唯幸於千倉

謝中書舍人表

起草八埒懼攝承之大譴判花四戶塵清切之近班自  
憐骨相之寒更冒身章之寵瞻天拜命跼地銜恩

中謝

竊以典冊之難古今所重欲發揮於聖意用鼓動於羣  
情必兼麗卿雲無翫骹詆嫫之病則上規姚姒有聲牙  
幽眇之風如臣者學殖就荒詞鋒愈鈍異時擢第竊入

洛之虛聲要路問程綴登瀛之顯列中遭禁錮久事蟄  
藏幸琴瑟之更張齒搢紳而復用疊懷郡黻洊易使軺  
遙聯郎外之名分摠軍儲之寄束春秋於高閣已謝毛  
錐呼庚癸於首山但防羽檄浸躋卿寺重到帝城蛻凡  
質於洿塗駭英游於夢境議禮同於聚訟弗通因革之  
宜孚號以之揚庭莫擬旦明之訓徒夸三組蔑補一毫  
叨睿主之親除正詞臣之高選顧掌制甚榮於內外豈  
備員能善於始終況朝政之所關雖敕書而可議詎容



握齟之品乃點論思之間獲戾有期循涯非據此蓋皇  
帝陛下剛健中正緝熙光明被六藝而佩禮文學惟稽  
古練羣臣而核名實官必擇材何取鯁生使陳薄技重  
念臣一門再世繼入北扉同產三人迭居西省茲對紫  
微之直實增棠棣之華蒙兩朝雨露之私預盛時衣冠  
之數儻報恩之有路雖赴死而不辭

謝宣召入學士院表

叨翰苑之優遷循牆莫避拜綸函之嚴召瞻闕而趨仰

面命之非常豈心期之敢望

中謝

竊以嚴樂司馬之於

漢中外相應以義理之文張陸九齡之於唐出入得參  
乎謀議之職禮秩歷時而逾重官曹從昔而極清不惟  
專掌於代言至乃與聞於論相奠堦視蔭有五塲學士  
之期蓮炬分光非半夜鬼神之問迨皇朝之稽古廣賢  
路而得人或經年闕長而不除必接晝量才而後用如  
臣者學纔涉獵志不激昂自重入於脩門即浸階於華  
序久塵視草咸刺伐檀偶逢疆事之興且改郊禋之卜

鈴條潛動泥札交馳適以獨員復司外制初乏湧泉之  
思常懷閣筆之憂報單于之書何能遏邊萌之禍下奉  
天之詔無以感悍卒之心顧五技之盡窮覲一麾而可  
去忽頒鳳尾之詔驟陟鰲頭之班紫誥黃麻念史談嘗  
掌斯事前鴻後鴈至盧奕三居其官寵厚益驚職親曷  
稱茲盖皇帝陛下詳明政體精選人材賜宴清閒已命  
經筵之遞宿問民疾苦將修浴殿之舊儀既灼見於愚  
忠遂曲加於飾擢臣敢不益尋素業勉企前英雖慚華

國之辭敢負致君之學力行直道每懲朋比之私上報  
異恩儻效涓埃之補

謝賜衣帶鞍馬表

色絲盛服兼金賁於九環鉤轡文韉上駟來於六廐折  
腰增煥問景知慚中謝伏念臣質謝囊錐業荒裘冶試

演綸之末伎玷持橐之清班帶櫪具而冠進賢漫綴章  
逢之伍駕齧郗而驟乘旦敢萌馳驚之心驚此龍光被  
之駑猥此蓋伏遇皇帝陛下恩隆文陞禮重禁林市駿

而築燕臺始於郭隗解衣而呼陸九如彼唐宗仰叨覆  
載之私曷稱便蕃之錫著鞭而騏驎居後難逃劉琨之  
譏束帶而賓客與言竊起公西之慕

盤洲文集卷三十八

欽定四庫全書薈要卷一萬五千七百八十九

集部

盤洲文集卷三十九

宋 洪适 撰

表十九首

辭免簽書樞密院表

厖恩曲被實深非據之憂溫詔下盼益重若驚之寵控  
忱詞而屢瀆期聰聽之可回惟敬俟於嚴誅或退尋於  
故步 中謝 伏念臣斗筭小器佔畢陋儒遭逢特達之知  
度越輩流之上繪章締句尚堪鞭策於駑才經武整軍

烏可參陪於籌幄躡先俊軌必速煩言伏望皇帝陛下  
施等乾坤明垂日月鑒此由衷之請畧夫反汗之嫌改  
用英賢使分宥密之務庶幾庸瑣獲免顛隳之虞臣無  
任

謝表

間兩社而為輔超綴邇聯籌千里以折衝曷勝重任仰  
承殊命內集危衷中謝伏念臣處世卻行入朝寡與出  
言如綽莫追溫厚之風持論不根祇瀆崇高之聽每虞

幽黜獨忝誤知方進陟於禁林忽躡居於宥地偃辭弗  
遂尸素惟憂念君臣遇合之難况之千載顧兄弟因循  
相繼曾不一年寵既疊於私門望豈孚於公議茲蓋伏  
遇皇帝陛下勵精治具垂意人材求儒雅以參大猷術  
分邪正有常德以立武事道叶弛張雖當偃革之秋尤  
軫解紃之慮謂臣慙愚之見寸或有長知臣頑鈍之姿  
詳於已試欲其中立責以自強故奎畫有明諒誠易之  
褒而玉音申可否毗贊之戒眷存至此報塞謂何懼無



補於幾庭終難逃於譴域臣敢不瞻前為監善後是圖  
取人絕親舊之私遇事去明黨之敝佩丁寧之訓常恐  
雷同輸悃悞之誠更期海納臣無任

德壽宮謝表

致身紫橐浸高視草之班接武黃樞初乏徙薪之策仰  
祇茂渥莫遂深辭中謝伏念臣性愚不移材薄無用咨

四岳能典朕禮微討論制作之長俾萬姓咸大王言非  
明白溫純之比久忝俊軌屢觸危機載尋匱草之盟首

預乘輅之選念先臣有雪氊之厄雖禿節之尚存而同  
產遭霜簡之彈亦覆車之可畏偶憑帝力獲締鄰驩將  
瀝請以休故山忽拜恩而長翰苑未安坐席又陟籌帷  
顧宥密之責匪輕懼譴訶之事難免茲蓋伏遇太上皇  
帝陛下蹈堯舜聖神之迹記蘇張忠義之家兩世受知  
曷報隆天之施一門集寵洵叨政地之除內揆僥踰益  
增隕越臣敢不鞭笞駑駘景行英塵抱公滅私常無忘  
於三省整軍經武庶有補於一毫臣無任

謝賜生日生餽表

溫檢成章軫門弧之初度貴貂傳命拜臺餽之多儀自

顧冥頑甚慚錫予

中謝

伏念臣學不足以通治體材不

足以贊沉機自登筆橐之班浸躡鈞樞之任一塵無補

百謫是憂祿弗洎親方篤蓼莪之感恩斯逮下更叨華

袞之褒此蓋伏遇皇帝陛下仁等上天禮優近輔有覲

餽牢之賜以榮犬馬之生竊摭孤忠曷酬洪覆臣無任

辭免參知政事表

使璫狎至方戰越於新班詔札鼎來未允俞於微悃危  
倖臨谷辭迫循墻中謝伏念臣弱羽不可高飛驚駕焉  
能遠適入朝見嫉防市虎之相侵憂國無聞笑井蛙之  
奚算自參宥畫益負空餐忽叨制渥之私俾預政途之  
列儻貪榮而不懼必獲戾以何逃伏望皇帝陛下責實  
循名量材授任憐孤蹤之安用寢茂命於已行別選異  
能式隆上治臣無任

謝表

政塗備數莫贊畫一之規樞筦攝空奚堪共二之寄偃

僂弗回於寵命戰兢徒集於微躬

中謝

竊以帝王以知

人為難臣鄰以得時為慶必繙熙朝之業始凝弼后之  
勲亶上聖之有為咨實材之可用權綱欲振治具未張  
士風奔競而所患乏材軍政糾紛而曷為立武豐財孰  
究其策去弊莫知其方既台緄之位尚虛故輔臣之責  
尤重如臣者荒疎之學不足以斷國論區瞽之識不足  
以燭事機誤簡淵衷浸超華轍惟基命於夙夜甫玷近

司儻責備於春秋已奸黜典敢謂九天之渥益躋兩地  
之班在三卿之中方期學步於百寮之上尤懼代庖鏤  
骨銜恩汗顏就列茲蓋伏遇皇帝陛下大明獨照洪覆  
兼容謂其久待清光體勵精圖治之意使之共調元化  
成砥節首公之名臣敢不仰稱選掄自加鞭策正紀綱  
而守法度誦聖語以力行籌帷幄而坐廟堂竭愚誠而  
思報臣無任

德壽宮謝表

祇拜恩言進陪政路偃僂莫回於茂渥超超有覲於周

行

中謝

竊以股肱之寄責之二三臣文武之柄繫乎東

西府非得夾邦之彥曷隆致主之名如臣者學不能考

古而驗今材不能任重而致遠叨兩朝之殊眷躡多士

之清班歲月浸淹涓塵奚補報淮南之詔雖嘗召於王

褒草贊普之書終遠慚於陸贄甫從鰲禁入贊鴻樞帷

幄運籌無邊衝之可折絲綸出命豈國論之能參集此

僥踰若為稱塞茲蓋伏遇太上皇帝陛下如天覆燾猶

日照臨謂其世紹箕裘或佩教忠之訓使之位聯鼎軸  
儻收偃武之功臣敢不銘骨知榮糜軀思效仰輔協華  
之治常虞竊位之譏臣無任

辭免除右僕射兼樞密使第二表

大庭渙號仰驚茂渥之盼細札成文未徇愚衷之請敢  
干威咫尺仍瀝忱辭中謝伏念臣復近觚稜初無介紹受  
非常之知遇忝不次之遷除雖孤蹤屢至於阽危獨淵  
覆曲為之涵宥既超籌幄浸列政途一言可以興邦曾



靡筦闕之益四岳有能熙載遽叨柄用之私念大君摠  
攬於權綱欲內治修明於法度行信賞必罰之政求舉  
偏補弊之方杜邪枉之門去朋比之黨財糞公私之皆  
足事期小大之畢張非得真賢曷勝重任豈伊僕邀可  
備使令竊深據蒞之憂何止伐檀之刺伏望皇帝陛下  
乾坤委鑒曜魄垂光別求有用之材俾免疾顛之患臣  
無任

第三表

階六符以觀天象，慚齊色月三日而成魄。勢合辭盈，荐  
瀆蓋高，自知不宥。中謝伏念臣器非任重，識不燭微。自  
躡政塗，卽尸宰枋。樞機周密，宣神爵五鳳之年。威福剛  
柔，昧洪範九疇之叙。況此相臣之闕歷乎旬月之期，予  
印惟難拂，龜有待茲竊處中之位，必貽歇後之譏。伏望  
皇帝陛下念不移之愚，追已下之命，曲全叢品，用穆僉  
言。臣無任

謝表

誇朝尸祿已寬策免之科當軸秉鈞更誤庭揚之命渙

音弗反朽質自驚

中謝

竊以宰相遂萬物之宜實求康

濟之效天下猶一堂之上可使咸欣之殊儻膠柱而無

應變之長或括囊而乖盡瘁之義則不能仰崇后德下

慰民瞻必有隆棟柱石之材始堪巨川舟楫之用豈伊

匪據可以自強如臣者天子凡姿人知窘步幸千齡之

獨遇致一歲而屢遷尊俎折衝媿汲直寢謀之美璣衡

齊政蔑舜官熙載之能雖區區欲塞於偉門亦惴惴恐

行於危道祇憑聖察敢罄愚誠不勝丹慊之憂輒請素餐之罪甫蒙恩宥迺玷褒除宰席踐久虛之班籌幄高對掌之職䟽封侯壤進秩文階寵渥便蕃有此雨露之澤制詞訓敕出乎雲漢之章竊願罷駕若為補報恭惟皇帝陛下焦勞圖治寤寐求賢視朝有禹湯之明當饋發蕭曹之歎神聖其臣莫及尚采鄙言天地之德曰生曲全弱植矜其不逮勉以有為臣敢不期稱所蒙力行不變佩患失徇私之戒久矣書紳守奉公履正之規庶

其補袞臣無任

謝宮祠表

旬月贊襄終負和羹之美一朝顛沛自貽覆餗之殃仰  
戴仁天得賒死地驚魂未返渙命難勝

中謝

伏念臣材

匪時湏仕無人望指修門而重入偶被簡知登要路以  
亟遷久遭冒嫉既參宥畫馴陟台司不量駑鈍之姿欲  
副丁寧之訓然力小安可以任重惟本弱故易於根危  
茲因變理之非願請曠瘼之罪庶圖上印獲免傷弓眷

注未衰尚褻辭之在耳詆訾不恕忽彈奏之吹毛獨賴  
聖明特寬典憲徹侯就國已乖巖石之具瞻秘殿奉祠  
無異急流而勇退制音偃受感涕交揮茲蓋伏遇皇帝  
陛下寵厚股肱禮存體貌方此燭幽達枉不盡信於多  
言憐其執法奉公致浸奸於衆怒未減投荒之譴保全  
出晝之行臣敢不鏤骨銜恩洗心思咎乾坤莫報益堅  
存闕之忠畎畝可歸或企灌園之迹臣無任

紹興府謝到任表

上丞相之印甫獲退藏懷會稽之章遽叨進用既自天

而申命即便道以之官

中謝

伏念臣識闇物先品居人

下幸際風雲之會浸塵柱石之班佩聖訓之丁寧靡辭  
任怨忘驚姿之謏薄強欲徇公曾未見於大中已見愠  
於羣小彈文雜襲雖投裔不快其私淵度矜容使歸田  
以避其毒自違威咫尺半閱歲華仰沐知憐屢形獎錄敢  
覬起家之寵遂膺維屏之除拔拭恩隆糜捐報淺惟茲  
禹會是謂介藩職連率則長於東方諸侯拱行闕則比

之西都三輔就堯如日身既近於長安入越之疆心甚  
慚於范蠡所虞瘼曠復誤使令茲蓋伏遇皇帝陛下擇  
共理之材振內修之政大明黜陟小人之道日消獨摠  
權綱五帝其臣莫及不棄蓋惟之舊俾分戟燾之榮臣  
敢不思稱所蒙自鞭其後布宣德澤唯民瘼之是求剗  
剔姦貪冀州箴之可舉臣無任

朝永祐陵表

維乾道二年歲次丙戌十月辛未朔十二日壬午具位



臣洪某恭詣徽宗皇帝永祐陵攢宮朝謁者臣某頓首  
頓首言曰垂衣裳於盛旦咸仰文謨藏弓劍於名山茲  
連禹穴臣牽絲自外涖篆惟新敢循守土之常獲展拜  
陵之敬恭惟聖鑒俯諒微衷臣某頓首頓首謹言

諸后攢宮表

續有嬖之史永播徽音瞻於越之山實藏大練臣牽絲  
有命懷組是邦敢遵故事之常式展幽宮之敬恭惟靈  
鑒俯諒微衷

謝賜銀合臘藥表

速郵斯暨良劑來盼遙拜明庭敬藏溫詔

中謝伏念臣

叨臨近輔甫對杪冬年在中身同早衰之蒲柳藥皆上品如遠采於蓬萊輔以朱提之珍賁於宛委之域沉疴可免腴予惟榮此蓋伏遇皇帝陛下仁德宅中恩波浹下使臣以禮茲存體貌之餘視民如傷況乃股肱之舊故推賜式俾護生經儻賒溝壑之填必報乾坤之施臣無任

謝賜歷日表二

重離南面初臨再劫之年大火西流斯正餘分之歷新

書誕布綿寓前知

中謝

伏以業纂疇人數或譏於乖次

事傳邃古法尤重於歸奇恭惟皇帝陛下以天聰明如  
日臨照九疇攸叙斂五福以錫民七政以齊定四時而  
成歲同文所暨開卷遂行臣職忝十連壤均三輔火耕  
水耨俾不失於農期夜寐夙興唯深思於王事天儀默  
運茲臨上戊之纏民用前知如揭先庚之信奏篇既出

賜札惟均

中謝

恭惟皇帝陛下離治嚮明乾剛行健解

絃更化奮木鐸以令兆民截管考聲在玉衡以齊七政  
清臺所考縣寓式同臣久玷竹符再開穗厯司分司啓  
已知來歲之宜或耔或耘益勉西疇之事

謝賜夏藥表

時臨三伏孰禦炎威扎降十行鼎來珍劑偃躬登受盥  
手開嘗

中謝

伏念臣猥典价藩密依魏闕比因衰病將

辟穀以追赤松之遊茲拜恩盼可入門而遠黃熊之夢

此蓋伏遇皇帝陛下仁懷舊弼物重常儀御南風之琴  
普令解慍賜西山之樂曲使衛生儻幸免於熱中期永  
肩於報上

安恭皇后上僊慰表

祿起坤倪光沉軒曜凡居覆載靡不哀摧中慰伏以大  
行皇后著德椒塗傳芳蘭館葛之覃兮于中谷允蹈雅  
言夏之興也以塗山聿追前躅孰謂倪天之聖遽虧朔  
日之明恭惟皇帝陛下化格御邦恩隆儷極懷哉淑範

悼故劍而不忘布此黼筵覩副禕而有感願遵經禮俯  
割悲悰臣限以職守不獲奔赴闕庭稱慰

盤洲文集卷三十九